

解州全志卷之二 平陸縣

山川

中條山在縣北四十里西起蒲州雷首延袤數百里
迤邐而東直接太行其靈岩異巘翠碧丹岑則隨地
異名西連解州芮城北通夏縣安邑隸縣境者特東
南一隅也

三門山在縣東五十里黃河中水經禹鑿河道三門既
決謂之三門史記正義禹鑿此山三道河水故曰三
門綱目質實山有三門禹鑿以通南曰鬼門中曰神

門北曰人門故謂之三門集津

趙冬曦三門賦序

砥柱山之六峰者皆生河之中流蓋夏后氏之所開
鑿其最北有兩峰相對距岸而立即所謂三門也次
於其南有孤峰揭起峰頂平濶禹廟在焉復次其南
有三峰東曰金門中曰三堆西曰天柱湍水從黃老
神前東流折而南激於三門包於廟山淙於三峰之
下會流東注加以兩岸夾水壁立千仞盤紆激射天
下罕比

砥柱峰在三門東迤南黃河中流高數仞石形如柱禹

貢東至於砥柱即此 孔安國書傳砥柱山河水分
流包山而過石見水中若柱然也又未堆山在砥柱
東唐時歲漕經砥柱多覆河中有山號未堆運舟入
三門僱平陸人為門匠執標指麾一舟百日乃能上
諺云古無門匠墓謂皆溺死也又有閼流亦在砥柱
東上激六峰下阻十九灘自砥柱以下五戶以上其
間一百二十里河水竦石桀出勢連襄陸蓋亦禹鑿
以通河其山雖闢尚梗湍流環波怒溢合有一十九
灘水流迅急勢同三峽破害舟船自古所患 按未

堆閣流二山今不可考五戶灘名有神祠通謂之五
戶將軍今亦不知所以也都穆遊砥柱記三門之廣
約二十丈其東百五十步即砥柱崇約三丈周數丈
相傳上有唐太宗碑銘銘禹也宋時猶在今不存蔡氏書傳
以三門為砥柱州志亦謂砥柱即三門皆誤又隋書
大業七年砥柱山崩壅河逆流數十里今砥柱屹然
中流奚有崩摧而能壅河逆流者蓋距河兩岸皆山
意當時或崩遂以為砥柱也

金門山在縣東五十里三門之北岸孤巒特出屹立河

千上建神禹廟古柏叅天四圍拱翠俯瞰河流奔騰
東下殊駭人心目三門石壁有古刻云南鬼門中夜
叉門北金門金門之名本此

紫金山在三門之東岸下有神仙洞洞口危險深不盈
丈世傳為神仙所棲又禹功岩石壁數仞勢若削成
昔人曾磨崖記禹功焉歲久字跡剝落不可復識而
三門前峙四載疏鑿之功宛然在目又虎嘯谷俯臨
大河怒濤聲吼恍若風生谷中又翠陰岩石壁峭立
緣石藤蘿四垂殊為幽勝又掛鼓石奇峰插天嶙峋

萬狀相傳禹治水時掛鼓於此即磬鼓鳩工之意昔人有詩曰編欄驚踞虎騫舉類飛鳶

傳巖在縣東二十五里聖人澗上兩山之峽曲岸廻巒即說版築處有祠按水經注沙澗水北出虞山東南逕傳巖歷傳說隱室前俗名為聖人窟孔安國傳說隱於虞虢之間即此處也

鳳凰山

名見大郎廟碑記

縣北三十里當中條南麓勢走川原

兩翼隆起分左右而下形如鳳凰故名上建大郎廟有古栢大十數圍蓋千年物也

吳山縣北五里自中條山連絡南下形跨川原路史殷
時有吳伯今陝之平陸有吳山 按由縣北鳳凰山
右下迤邐十餘里突起一阜俗名神圪塔相傳吳太
伯廟舊址在此疑此乃吳山也又劉昭注太陽有吳
山上有虞城史記秦昭王伐魏取吳城括地志中條
山亦名吳山通典吳山即吳驥垂耳駕鹽車之所金
志平陸有吳山黃河日知錄後漢郡國志太陽有吳
山上有虞城他書虞城之書為吳城猶吳仲之書為
虞仲也

古吳虞二
字通用

分雲嶺縣西北四十里中條山一峰南眺大河北俯鰲池走霧分雲視諸山獨為嵌峩

橫嶺在縣北四十五里中條山之脊西通解州東達夏縣北至運司路名車輞峪舊行鹽車今徑路險仄車不能行

清涼山在縣東北七十里古虞城北乃條山一脉山頂曠濶四望無際俗謂四州圪塔蓋可以目極蒲解絳陝也

錐子山在縣東九十里孤峰似錐層巒旁列唐志三錐

山當即此上有天池廣丈餘深約數尺

箕山在縣東九十里旋徑危峰其形如箕相傳許由巢父隱此中有許由塚古柏森立皆大數圍下有清澗云巢父洗耳處

晚照臺在縣東八十里錐子山支拔地千尋壁立如削西日迴射紫光掩映不減天台赤城

曉挹山在縣東六十里重巒疊嶂東接錐子山每旭日初升霞暉四映洗耳河發源於此

天井山在縣西北四十里三峰平時中峰獨高俗名筆

架山為縣治來脉之祖其上有天井口濶數尺深不可測牧人以衣衫裹石投下逾時復上亦一異也

石門在縣西北四十里中條山王家井西北十里有黃巖石門水經注鹽販之澤南面層山天巖雲秀池谷泉深左右壁立間不容軌謂之石門路出其中名之曰徑南通上陽北暨鹽澤

黃河縣南三里自河津龍門至蒲州南至於潼關折而東至芮城逾平陸東至於砥柱又東過垣曲下孟津按大河旋繞邑境沿河灘地最宜麥豆一或泛漲

則盡淤矣比年狐家窩至盤南鋪水勢北騰瀕河地
裂幾十餘里然斷岸巉崖土多沙石豈當時原自盤
陵而下循東西灣為故道耶顧邱壠皆圯民甚患之
三汭澗在縣北三里發源中條山東西二溝分流至五
龍廟前合為一迤邐繞縣治北郭東郭外入於河臨
溪圃人引水灌溉頗饒蔬菓之利

五股泉在縣北一里許水寒冽

古焦水在縣東北五里細流涓涓不一里入河相傳武
王封神農後於焦即此俗名焦子泉 水經注陝縣

故焦國 竹書紀年幽王七年虢人滅焦

盤南澗在縣東十里發源條山由石槽溝南下至盤南
東入於河 國朝知縣潘鉞鑿崇岡引水以灌民田
名曰潘公渠今闕

沙澗在縣東二十五里發源條山東南谷至沙澗村入
河村民引以灌田頗資為利然雨多水漲沙石俱下
歲事疏濬費民力云

聖人澗在縣東北二十五里發源馬跑泉下復有二泉
合流嵌石濬洄遶傅岩南入於河孔傳所謂澗水壞

道即此

馬跑泉在縣東北三十里傳說塚下塚倚崇岡東西兩山環拱廻巘列屏泉殊清瑩相傳形求至此馬跑得之合下石穴二泉至傅岩為聖人澗

清澗在縣東六十里發源曉挹山東折而南經許由塚東南入於河相傳巢父洗耳處一名洗耳河

黑龍潭在縣東一百二十里峪口村有東西二峪從西峪入連峰四起峭壁夾立捫蘿緣崖約行二十里山合如甕而缺其前一水自巔分兩磴而下上瀦為龍

潭下為風潭，渟碧蓄黛，森陰凜人。歲旱，禱雨輒著靈異，而人跡罕至，舊乘遂失載焉。潭水出峪口，經五臺寺、曹家河，至南溝，入河。邑人杜若拙有禱雨記。

馬頭澗在縣東北四十五里，中條山麓危峰聳立，兩谷二源環麓合流，以山形肖馬首，名。

響泉在縣北四十里，中條山東，水甘澄，俗稱響泉溝。張谷澗在縣西二十里，張峪村。

圪塔澗在縣西二十五里，圪塔村。

葛趙澗在縣西四十里，發源中條山深溝，夾流經南侯。

村至葛趙村村人引以灌田又南流二里入於河
儀家溝在縣西五十里岳村左東為閒田址通典有閒
原卽虞芮讓畔處

水利附

三汭澗在縣北三里源出中條二水分流至五龍廟合
遶縣北郭東郭外入河臨溪圃人分水引渠頗饒蔬
菓之利

盤南澗在縣東十里由石槽溝南下至盤南村入河康
熙五十年知縣潘鉞鑿崇岡緣崖引水灌東西二灣

民田數頃未幾沙壅崖崩人力難施今廢

沙澗在縣東二十五里源出條山東南谷至沙澗村入河頗為民利而水激宕多沙石歲費疏濬云

葛趙澗在縣西四十里由南侯村迤邐至葛趙村入河灌田數頃頗稱沃壤

興文渠 萬歷二十三年知縣魏學徵引水入城疏通文脉自縣署遶學宮之左注於泮池名曰興文渠曹于汴有記今北門外有魏公渠碑

風俗

輿地志曰河東魏晉以降大抵勤儉禹德所型憂思唐
風之遺士大夫質直無險譎百姓朴淳畏法盡力南
畝婦女織紉亦勤此河東風俗而平陸可概見矣地
處條崗俯臨大河北戶絃誦文風日盛科第仕宦後
先相望若箕山之高風峻節傳相之憲天師古虞公
之悔過讓田宮奇之抗節抒忠懿踪芳規照耀千古
此則平邑人士所當企慕無窮者也